



Vischnaunca  
**Tujetsch**

## **Protocol dalla 7. radunonza da vischnaunca**

dils 21 d'uost 2024

allas 19.00 uras en l'aula dalla Scola Sedrun

**Protocol nr. 7 dalla radunonza da vischnaunca dils 21 d'uost 2024  
allas 19.00 uras entochen allas 21.20 uras,  
en l'aula dalla Scola Sedrun**

---

Presidi: Martin Cavegn (president communal)

Protocollista: Simona Giossi

Dumbravuschs: Silvio Schmid e Maurin Cavegn

Presents: 27

Perstgisas: Daniel Schmid, Armin ed Iris Giossi

**Tractandas**

1. Avertura e beinvegna
2. Protocol nr. 6 dils 22 da matg 2024
3. Approbaziun dalla revisiun totala dalla nova lescha per la concessiun da terren en dretg da baghegiar
4. Approbaziun dils contracts da servitud denter la Vischnaunca Tujetsch e las Ovas Electricas Reinanteriur SA (KVR AG) pertuccont il dretg da baghegiar ina nova reit d'energia ella via da Nalps
5. Approbaziun dallas duas novas zonas da ruaus per la selvaschina en Val Val e Val Giuv sco mesiras da cumpensaziun per la nova construcziun da petgas da sigliantar lavinas
6. Orientaziuns
7. Varia

## **1. Tractanda            Avertura e constataziuns**

Il president communal fa in cordial beinvegni a tuttas convischinas e tuts convischins sco era als commembers dalla cumissiun da gestiun tier la siatavla radunonza da vischnaunca dil trienni 2023/2026. In'informaziun impurtonta ch'il president communal declara ei igl agir futur dalla protocollaziun dils numns. Entochen il december 2023 ein ils numns dils convischins adina vegni screts ora cumpleinamein els protocols. Cun la decisiun dalla radunonza da vischnaunca dils 6 da december 2023 ei vegniu concludiu da scursanir ils protocols da vischnaunca. El medem mument ha la protocollista entschiet a redeger sulettamein las inizialas dils convischins – quei per motivs da schurmetg da datas. A caschun dalla radunonza da vischnaunca che ha giu liug ils 22 da matg 2024 han dus convischins priu il plaid ed han supplicau la suprastonza communal da citar las persunas che prendan il plaid cul num entir. Sinaquei ha la protocollista contactau igl Uffeci da vischnauncas dil cantun Grischun per sclariment en caussa.

Per risposta havein nus survegniu il suandont:

Il num ed il prenum astgan sulettamein vegnir protocollai sche la persuna che pren il plaid dat ordavon il consentiment alla protocollista. Mo entras il consentiment dalla persuna singula vegn buca cunterfatg alla lescha dil schurmetg da datas.

### **Concretamein munta quei il suandont:**

Ella pratica vegn ei ad esser aschia che la persuna che pren il plaid sto explicitamein pretender (avon ni suenter siu plaid) che siu num vegni numnaus cumpleinamein el protocol.

Senza igl explicit giavisch da nominaziun compleina dil plidader vegn sereferiu sil tal sco convischin resp. convischina.

## **2. Tractanda            Protocol nr. 6 dils 22 da matg 2024**

Suenter ch'il protocol nr. 6 dils 22 da matg 2024 ei vegnius publicaus en nies fegl official La Tuatschina nr.12 dils 14 da zercladur 2024 ein neginas protestas vegnidas inoltradas el decuors da 30 dis dapi la publicaziun. Il protocol ei cheutras approbaus.

## **3. Tractanda            Approbaziun dalla revisiun totala dalla nova lescha per la concessiun da terren en dretg da baghegiar**

Il president communal presenta la tractanda e menziunescha che la suprastonza communal hagi giu agid d'in giurist per elavurar la nova lescha. Il president communal explichescha ils artechels nua ch'ei hagi dau midadas en cumparegliaziun cun il vegl regulativ.

Vinavon menziunescha il president che tut quels che hagian serrau giu in contract da concessiun da terren en dretg da baghegiar sappien surprender las cundiziuns dalla nova lescha, denton resti il cuoz dil contract vegl valeivels.

### **Debatta d'entrada**

Tier la debatta d'entrada han treis convischins priu il plaid:

Convischin 1 pren il plaid el num dalla maioritad dils convischins da Spinatscha che han contracts da concessiun da terren en dretg da baghegiar. Il convischin explichescha differents puncts daco che la lescha seigi buc attractiva e stuess aunc ina gada vegnir revedida. Per els seigi la nova lescha per exempel buc attractiva sch'els veglien vender la casa avon ch'il contract spireschi. Ils convischins hagian giu la para che la suprastanza communal dicteschi cun la nova lescha. Priu il cass ch'ei hagi plirs interessents sappi la vischnaunca dictar a tgi vender il terren. Aschia ch'el fa la proposta da dar anavos la fatschenta e da buca tractar ella. Convischin 2 pren medemamein il plaid e declara che la lescha eri da lezs onns in grond agid per insumma saver baghegiar ina casa. El sedamonda sch'ei fussi pusseivel da cumprar giu la casa, respectivamein la parcella.

Il president communal queta ei fetg bien ch'ils convischins da Spinatscha seigien sesi ensemen ed hagian elavurau ina posiziun. El hagi capientscha per ils puncts numnai. Era en suprastanza communal hagi ei dau bia discussiuns pertuccont l'attractivitat dalla lescha. Ins savessi differenziar denter la valeta dalla parcella e la valeta dalla casa. Denton constatescha il president ch'ils convischins veglien ozildi enzatgei auter che quei ch'ei eri vegniu fatg giu el contract d'antruras. La lavur dalla suprastanza communal seigi da representar igl interess public ch'ei possesur dallas parcelas e dar la schanza a famiglias giuvnas da baghegiar casa e buca da favorisar singuls privats.

Convischin 3 declara aunc ina gada igl intent dalla lescha e menziunescha ch'igl aspect politic dalla lescha seigi fetg impurtonts.

Il president communal declara aunc inaga che sche la suprastanza communal sedecidess da vender las parcelas lu detti ella giu la controlla ed hagi negina influenza pli. La suprastanza communal vegli dar bunas cundiziuns allas famiglias giuvnas e fetschi tut il pusseivel encunter il svilup dalla demografia. Quei sappi ella mo far sch'il dretg da tschep crodi puspei anavos alla vischnaunca. Tala vegli evitar che parcelas mondien tier privats e lezs sappien lu vender ellas tenor prezis da fiera. Quei sedrizzassi encunter igl interess public.

## **Votaziun**

**La radunonza da vischnaunca approbescha cun 17 vuschs gie, 5 vuschs na, e 2 abstenziuns da buca entrar en la tractaziun dalla fatschenta e da dar anavos la nova lescha per la concessiun da terren en dretg da baghegiar alla suprastonza communal.**

## **Tractanda 4**

**Approbaziun dils contracts da servitud denter la Vischnaunca Tujetsch e la Ovras Electricas Reinanteriur SA (KVR AG) pertuccont il dretg da baghegiar ina nova reit d'energia ella via da Nalps**

Il president communal declara che la summa da frs. 100'000.00 vegni pagada il mument che NalpSolar vegni baghegiu. El mument seigi ei aunc buca clar sche NalpSolar vegni insumma baghegiu.

## **Debatta d'entrada**

Negina debatta d'entrada ei giavischada.

## **Votaziun**

**La radunonza da vischnaunca approbescha unanimamein ils contracts da servitud denter la Vischnaunca Tujetsch e las Ovras Electricas Reinanteriur SA (KVR AG) pertuccont il dretg da baghegiar ina nova reit ella via da Nalps.**

## **Tractanda 5**

**Approbaziun dallas duas novas zonas da ruaus per la selvaschina en Val Val e Val Giuv sco mesiras da cumpensaziun per la nova construcziun da petgas da siglientar lavinias**

Il president communal presenta la tractanda e declara che la necessitad per crear ina nova zona da ruaus en Val Val e Val Giuv seigi sedada entras la damonda da baghegiar novas petgas da siglientar lavinias dalla Andermatt-Sedrun Sport AG (ASS). Per saver garantir la segirtad sin las pistas denter il Schneehüenerstock ed Alpsu sco era naven da Cuolm Val a Val Val ein novas petgas da siglientar lavinias indispensablas. Quei project pretenda denton mesiras da cumpensaziun per la protecziun digl urlaun (Schneehuhn). Cunquei che las pusseivladads da crear ina nova zona da ruaus ella regiun d'Ursera ein buca avon maun ha l'ASS dumandau la Vischnaunca Tujetsch per agid. Avon che saver inoltrar la damonda da baghegiar sto la vischnaunca da Tujetsch decider davart las zonas da ruaus.

La suprapostanza ha en quei connex suttamess la proposta el messadi ch'ei vegnida approbada dallas instituziuns digl ambient. Vitier han ils guides da muntogna fatg ina nova proposta. Tala preveda in slargament dil corridor per far turas che vegni segir aunc proponida durant questa sera.

### **Debatta d'entrada:**

Tier la debatta d'entrada han dus convischins priu il plaid:

Il representant dalla ASS declara aunc inaga la necessitad da quellas zonas da ruaus. Quellas seigien da basegns per la segirtad silla pista 30 e silla pista dalla Val da Stiars. La ASS seigi lundervi d'investir 3-4 milliuns francs per baghegiar las petgas da sigliantar ed aschia saver segirar las pistas. Sch'igl UFT (Uffeci federal da traffic) detti buca la lubientscha per quellas novas zonas, lu sestauschi il baghegiar per in onn.

Il representant dils guides da muntogna pren il plaid e declara ch'ils guides mondien buca d'accord cun la surfatscha proponida el raiun da Tgombras. Els seigien buca cuntents ch'ils guides seigien buca vegni dumandai ordavon. Cun la nova zona da ruaus prendien ins naven als guides ina tura che seigi bein contonschibla e vegni nezegiada ella sesiun bassa sco plazzal d'instrucziun. Ins res-chi aschia che las uniuns da turas desistien egl avegnir da vegnir tier nus. La varianta presentada fussi in cumpromiss pils guides. Cun quella savessien els ir d'accord e plinavon vegnessi la zona da ruaus leutras aunc pli gronda - tgei che fussi in avantatg.

Il representant dalla ASS havevi ordavon mussau la varianta cul corridor al giurist e lez havevi sincerau ch'igl UFT vegni buc a dar la lubientscha per quella varianta. Quantitad seigi buca il medem sco qualitad. Igl urlaun drovi buca dapli plaz, mobein il dretg plaz per survivor.

In convischin fa la proposta pragmatica da votar per la varianta el messadi e lu mirar cun igl UFT e las instituziuns d'ambient schebein ei fussi buca pusseivel d'anflar in cumpromiss. Il president communal manegia che quei fussi ina pusseivladad.

### **Votaziun**

**La radunonza da vischnaunca approbescha cun 20 vuschs gie, 3 vuschs na e 4 abstenziuns las duas novas zonas da ruaus per la selvaschina en Val Val e Val Giuv sco mesiras da cumpensaziun per las novas construcziuns da petgas da sigliantar lavinas. Las petgas da sigliantar lavinas vegnan montadas d'ina vart ella Vagliauna / Fellital denter il Schneehüenerstock ed igl Alpsu – per l'ina per segirar la pista 30 dalla SkiArena Andermatt-Sedrun e da l'autra vart per segirar las pistas en Val Val (denter Cuolm Val e Tiarms / Alpsu).**

## **Tractanda 8            Orientaziuns**

Il gerau GM orientescha davart duas caussas:

### **Sanaziun Bogn Sedrun**

Ils cuosts dalla sanaziun dil Bogn Sedrun stettien aunc adina en rama dils 12.4 milliuns ed ei vesi ora bein che l'avertura sappi haver liug ils 19 d'october 2024.

### **Zona 30 a Tschamut**

Miez settember 2024 vegni ei introduciu la nova zona 30 a Tschamut.

### **Geraua Desiree Willimann orientescha davart sia demissiun**

Desiree Willimann deplorescha fetg sia demissiun sco geraua per la fin d'october 2024. Denton selaschi la lavur sco geraua buca pli cumbinar cun sia nova lavur a Cuera e cun ils interess dalla famiglia. Ella engrazia per la fidonza dallas Tuatschinas e dils Tuatschins.

## **Tractanda 5            Varia**

In convischin pren il plaid sut varia e supplichescha la suprastonza communal da reagir ina proxima gada pli baul e da coordinar meglier ils plazzals da lavur. Las emissiuns da canera si entuorn il Bogn Sedrun seigien pil mument fetg aultas e la MGB lavuri mintgamai l'entira notg.

Gerau Guido Monn pren posiziun e declara ch'ins stoppi reagir avon che las lavurs entscheivien. Ussa seigi ei deplorablamein memia tard e las lavurs vegnien a cuzzar entochen october ni november. La suprastonza communal sesprovi denton da reagir ina proxima gada pli baul e da far il pusseivel per il ruaus dils convischins.

Vinavon damonda in convischin co ei vesi ora cun la planisaziun locala.

Il president communal declara che la suprastonza vesi plaunisù l'arrivada en quella caussa. Igl october seigi planisau seras d'informaziun e lu vegni la planisaziun locala suttamessa ad in process da cooperaziun (Mitwirkungsverfahren).

Protocollista:  
Simona Giossi

President communal:  
Martin Cavegn